



MERIDIAN JUNIOR COLLEGE
JC2 Preliminary Examination
Higher 2

Malay Language and Literature

9565/2

Paper 2

15 Sep 2017

1 hour

(Total time for Part 1 and Part 2)

Additional Materials: Writing Papers

ARAHAN UNTUK CALON

Jawab SEMUA soalan.

Kertas soalan ini mengandungi 4 halaman bercetak.

This document consists of **4** printed pages.

BAHAGIAN C (30 markah)

SUMBER A

Arahan: Baca petikan karangan di bawah ini dengan teliti.



Semangat Kejiranan Semakin Luntur

Oleh : Nurul Idayu Mohd Noor
18 Ogos 2017

Jiran ialah orang atau keluarga yang tinggal 40 buah rumah berhampiran dengan rumah kita sama ada di tepi, depan atau di belakang rumah kita. Dalam era globalisasi yang semakin canggih, kita dapat melihat hubungan kejiranan dalam kalangan masyarakat semakin kurang dititikberatkan.

Perkara ini berlaku disebabkan masyarakat sekarang hanya mengambil kisah hal masing-masing tanpa mengambil berat dan peduli tentang hubungan sesama jiran tetangga sehinggakan tidak mengenali siapa jiran mereka. Pelbagai faktor punca kelunturan semangat kejiranan yang dapat kita lihat dalam masyarakat zaman ini termasuk impak daripada perkembangan teknologi canggih.

Penggunaan peralatan elektronik seperti telefon pintar, gajet, televisyen, permainan video dan komputer riba yang memberi kemudahan untuk kita bersembang di alam maya seperti dalam aplikasi Facebook, WhatsApp, Twitter dan sebagainya. Ini menyebabkan kita merasakan tidak perlu keluar dari rumah untuk berjumpa dan bergaul dengan jiran tetangga malah tidak menghiraukan apa yang berlaku di luar pagar rumah masing-masing.

Selain itu, budaya kunjung–mengunjungi dan mengenali jiran tetangga khususnya di musim perayaan juga semakin kurang diamalkan oleh masyarakat masa kini. Gaya hidup masyarakat yang terlalu sibuk dengan urusan kerja turut menyumbang kepada perkara ini. Tambahan pula kos sara hidup yang semakin tinggi, lebih banyak masa dihabiskan mencari pendapatan tambahan daripada menghabiskan masa bersama keluarga mahupun merapatkan hubungan jiran tetangga.

Pada hujung minggu pula, kebanyakan daripada kita lebih suka berehat di rumah atau keluar beriadah bersama ahli keluarga. Tanpa disedari, tanggungjawab sesama jiran tetangga diabaikan sepenuhnya.

SUMBER B



Penduduk giat pupuk 'semangat kampung' menerusi kegiatan di estet perumahan

11 Jun 2017

Dalam satu kajian Gerakan Berbudi Singapura (SKM) baru-baru ini, penduduk Singapura didapati semakin jarang bergaul dengan jiran tetangga, dengan lebih ramai berkata mereka mahu menjaga privasi mereka dan tidak begitu menekankan semangat kejiranan. Tinjauan yang melibatkan 3,066 penduduk ini menunjukkan kemerosotan daripada 29 peratus kepada 23 peratus responden yang berkata mereka bertegur sapa dengan jiran lebih tiga kali seminggu.

Sejajar itu, usaha berterusan untuk memupuk kemesraan dalam kalangan penduduk giat dilaksanakan menerusi Program Pembentukan Semula Kejiranan. Salah satu cara untuk menggalak hubungan sosial lebih erat dalam kalangan penduduk adalah dengan mengadakan lebih banyak kegiatan di dalam estet-estet perumahan. Namun, untuk menganjurkan pelbagai kegiatan tidak begitu mudah tanpa infrastruktur yang sesuai.

Antaranya ialah pembinaan taman-taman permainan dan sudut kecergasan baru, plaza kegiatan yang dinaik taraf dan kemudahan-kemudahan lain yang dipertingkatkan di sekitar bandar dan estet perumahan. Sebagai contoh, Woodlands kini berwajah baru selepas selesai menjalani fasa kedua kerja-kerja naik taraf dan beberapa ruang masyarakat yang baru telah siap dibina.

Infrastruktur sebegini diharap dapat mendorong penduduk bergiat aktif dan memupuk 'semangat kampung' kerana mampu memenuhi keperluan mereka yang ingin mengadakan kegiatan-kegiatan seperti zumba dan sebagainya di ruang-ruang yang disediakan. Sekaligus, kepelbagaian kegiatan ini dapat menarik lebih ramai orang untuk saling mengenali dan memupuk kemesraan hidup bermasyarakat. Ruang plaza kegiatan ini dapat dijadikan tempat perhimpunan untuk mengeratkan ikatan sosial menerusi kegiatan-kegiatan yang dianjurkan.

Arahan: Berdasarkan Sumber A dan Sumber B, jawab soalan-soalan yang berikut dengan menggunakan ayat kamu sendiri

11. Berdasarkan Sumber A, huraikan sebab-sebab semangat kejiranan semakin berkurangan dalam kalangan masyarakat pada hari ini. (4 markah)
12. Berdasarkan Sumber B, bagaimanakah hubungan sosial antara penduduk dapat dipertingkatkan? (4 markah)
13. Dengan menggunakan Sumber A dan Sumber B, huraikan cabaran yang harus ditangani untuk mewujudkan semangat kejiranan dalam kehidupan masyarakat moden hari ini. (7 markah)
14. “Ruang plaza kegiatan ini dapat dijadikan tempat perhimpunan untuk mengeratkan ikatan sosial”. Berikan komen kamu. Jawapan kamu tidak harus melebihi 160 patah perkataan. (15 markah)

Selesai

SKEMA JAWAPAN

11. Berdasarkan Sumber A, huraikan sebab-sebab semangat kejiranan semakin berkurangan dalam kalangan masyarakat pada hari ini.

(4 markah)

Semangat kejiranan semakin berkurangan dalam masyarakat hari ini kerana

- i) sikap masyarakat yang hanya mengambil kisah tentang hal masing-masing tanpa mempedulikan tentang hubungan sesama jiran tetangga sehinggakan tidak mengenali siapa jiran mereka.
 - ii) Impak daripada perkembangan teknologi, khususnya penggunaan aplikasi media sosial telah menyebabkan masyarakat merasakan tidak perlu keluar dari rumah untuk berjumpa dan bergaul dengan jiran tetangga malah mereka juga tidak menghiraukan apa yang berlaku di luar pagar rumah masing-masing.
 - iii) gaya hidup yang terlalu sibuk mengurangkan masa untuk keluarga apatah lagi jiran tetangga lalu menyebabkan tanggungjawab sesama jiran diabaikan sepenuhnya.
12. Berdasarkan Sumber B, bagaimanakah hubungan sosial antara penduduk dapat dipertingkatkan?

(4 markah)

- i) Mengadakan lebih banyak kegiatan di dalam estet-estet perumahan untuk memenuhi keperluan dan citarasa penduduk seperti kegiatan zumba dan sebagainya.
- ii) Membina infrastruktur/ruang yang sesuai untuk dijadikan tempat perhimpunan bagi penduduk mengeratkan ikatan sosial antara mereka menerusi kegiatan-kegiatan yang dijalankan.

13. Dengan menggunakan Sumber A dan Sumber B, huraikan cabaran yang harus ditangani untuk mewujudkan semangat kejiranan dalam kehidupan masyarakat moden hari ini.

(7 markah)

- i) Sikap masyarakat yang kian lebih mementingkan diri sendiri dan lebih suka menyendiri. Sumber A - hanya mengambil kisah hal masing-masing tanpa mempedulikan hubungan sesama jiran. Sumber B - mahu menjaga privasi mereka dan tak begitu menekankan semangat kejiranan.
- ii) Perkembangan keadaan sekitaran yang telah menyulitkan lagi pergaulan antara jiran. Sumber A - perkembangan teknologi canggih menyebabkan masyarakat tiada rasa keperluan keluar rumah untuk berjumpa dan bergaul dengan jiran kerana boleh berkomunikasi secara dalam talian. Sumber B – kurangnya ruang terbuka untuk melakukan pelbagai kegiatan di kawasan perumahan.

14. “Ruang plaza kegiatan ini dapat dijadikan tempat perhimpunan untuk mengeratkan ikatan sosial”. Berikan komen kamu. Jawapan kamu tidak harus melebihi 160 patah perkataan.

(15 markah)

- i) Ruang plaza kegiatan memang sangat berguna jika dimanfaatkan oleh penduduk kawasan itu untuk menjalankan kegiatan-kegiatan yang melibatkan seramai mungkin penduduk kawasan itu. Berdasarkan sumber B, kegiatan zumba jika diadakan setiap minggu di ruang plaza sangat baik kerana popular dalam kalangan wanita lantas membuka peluang untuk saling mengenali .
- ii) Plaza kegiatan ini juga sangat berguna untuk mengadakan sambutan ulangtahun, majlis perkahwinan, sambutan perayaan pelbagai kaum dan sebagainya. Kegiatan seperti ini akan menarik perhatian penduduk-penduduk yang ingin mengetahui tentang budaya kaum-kaum lain. Maka itu, perhubungan berbilang kaum dan budaya dapat dieratkan.
- iii) Namun, ruang plaza belum tentu dapat mengeratkan ikatan sosial jika tiada kegiatan lanjutan atau promosi yang dianjurkan oleh pihak berwajib atau ketua dalam kumpulan akar umbi di situ. Walaupun Sumber A mengatakan media sosial punca kurang komunikasi antara jiran, ia sebenarnya boleh dimanfaatkan untuk menganjurkan kegiatan lanjutan. Contohnya, mereka boleh menggunakan facebook, instagram atau whatsapp mengikut kumpulan kegiatan untuk terus berhubungan dan mengeratkan silaturrahim.